

四庫全書

史部

欽定四庫全書

禮部志稿卷七十一

明 俞汝楫 編

科試備考

試法

初行科舉成式

洪武十七年三月戊戌朔命禮部頒行科舉成式凡三年大比子午卯酉年鄉試辰戌丑未年會試舉人不拘

額數從實充貢鄉試八月初九日第一場試四書義三道每道二百字以上經義四道每道三百字以上未能者許各減一道四書義主朱子集註經義詩主朱子集傳易主程朱傳義書主蔡氏傳及古注疏春秋主左氏公羊穀梁胡氏張洽傳禮記主古注疏十二日第二場試論一道三百字以上判語五條詔誥章表内科一道十五日第三場試經史策五道未能者許減其二俱三百字以上次年禮部會試以二月初九日十二日十五

日為三場所考文學與鄉試同鄉試直隸府州縣則於
應天府在外府州縣則於各布政司其舉人則國子學
生及府州縣學生員之學成者儒士之未仕者官之未
入流者皆繇有司申舉性資敦厚文行可稱者應之其
學校訓導專教生徒及罷閒官吏娼優之家與居父母
喪者並不許入試其中式者官給廩傳送禮部會試考
試官皆訪明經公正之士官出幣帛先期敦聘主文考
試官二人文幣各二表裏同考試官鄉試四人會試八

人文幣各一表裏提調官在內鄉試應天府官一人會試禮部內官一人在外布政司官一人監試官監察御史二人在外按察司官二人供給官在內應天府官一人在外府官一人收掌試卷官一人彌封官一人謄錄官一人對讀官四人受卷官二人皆選居官之清慎者為之巡綽監門搜檢懷挾官四人在內從都督府委官在外從守禦官委官凡供用筆札飲食之屬皆官給之舉人試卷自備每場草卷正卷各用紙十二副幅首書

三代姓名及其籍貫年貌所習經書在內赴應天府在外赴布政司印卷會試殿試赴禮部印卷試之日黎明舉人入場每人用軍一人守之禁講問代冒至晚納卷未畢者給燭三枝文字迴避御名廟諱及不許自敘門第彌封者編號作三合字謄錄者用硃考官用墨以防欺偽其會試中式者三月朔日赴殿試

建言取士法

洪熙元年四月鄭府長史司審理所審理正俞廷輔言

伏讀制勅有曰為國以得賢為重事君以進賢為忠竊以為進賢之路莫重於科舉近年賓興之士率多記誦虛文為出身之階求其實才十無一二蓋有年才二十者雖稱聰敏然未嘗究心於治人之道一旦僥倖挂名科目而使之臨政往往束手無為職事廢隳民受其弊自今各處鄉試乞令有司先行審訪務得通今博古行止端重年過二十五者許令入試比試則務選其文詞典雅議論切實者進之會試又加慎選庶幾士務實學

而國家得賢才之用上諭禮部臣曰所言當理其即行之又曰科舉之士須南北兼取南人雖善文詞而北人厚重比累科所選北人僅得什一非公天下之道自今科場取士以十分論南士取六分北士四分爾等其定議各布政司名數以聞

擇考官避嫌疑

正德十年七月給事中范洵言二事一擇考官謂各布政司鄉試皆用教官多不得人用是監臨官恒委其事

於簾外而自專進退之權請如兩畿例主考用翰林院六品以下官或事簡衙門五品以下官為之同考教官先期於各處提學官聽其選擇以充則真才可得一避嫌疑謂兩京府官子弟入場中式不免有倚勢之弊兩京顯官子弟不由府縣保送而徑自移文入場不免有僱代之弊請令兩京人各不得為兩府官而別府入仕兩府者其子弟親屬亦宜迴避宦遊子弟科舉聽原籍提學考試則高門不得妨寒畯之階公道不至為私意

所蔽矣禮部議覆以京官主考鄉試言之者多雖先朝偶一行然羣議紛起宜如舊例令各布政司照舊訪取教官供事如不及數令提學官以平日考居優等充之兩京府官干選法者宜令吏部查處兩府官及兩京官子弟入試宜如洵所奏行之詔可

監臨不與內簾事

嘉靖十年浙江巡按御史李佺言各省鄉試考官宜會同監臨等官揭書出題考試官取定試卷先期將號數

發出聽監臨官叅之墨卷以定去取禮部覆議考試監
臨各有職掌先大學士張孚敬題各省外簾官豫結生
徒密邇關節不公之弊莫甚於斯今復令外簾官叅之
墨卷不惟非祖宗糊名易書之法亦非今日補偏救弊
之意宜照先奉欽依事例未出榜以前監臨官不許干
與以撓職守出榜之後內簾果有不公等弊據實糾舉
曰各處鄉試事宜俱照原題准事例行監臨并外簾官
不得干預主考官務同分考官從公揭書出題三場策

題亦不許主考官預構以防奸弊以後會試俱遵照行鄉試錄提調官與考試官序名只照舊規不許更變

試條

奏科舉定制

洪武四年中書奏科舉定制凡府州縣學生員民間俊秀子弟及學官吏胥習舉業者皆許應試上曰科舉初設凡文字詞理平順者皆預選列以示激勸唯吏胥心術已壞不許應試

科舉別出題

永樂十七年三月為善陰騰書成命賜諸王羣臣及國子監天下學校又命禮部自今科舉取士準大誥例子內出題

遠方學生就近鄉試

宣德二年六月貴州布政司言普安州儒學生員皆是擺擺棘人莫知向學今選俊秀軍生王璽等入學讀書以備貢舉又言前奉禮部文書本司所轄州郡生徒堪

應舉者許於湖廣布政司就試緣去湖廣路遠於雲南
為近宜就近為便

中舍入試

成化七年五月中書舍人呂憲乞應順天府鄉試從之
刑科給事中芮畿言國朝開科取士凡有職人員入流
品者不得入試近者中書舍人呂憲乞應順天府鄉試
有旨允之不為例然中書舍人係七品近侍官非進士
監生不授憲以故父翰林學士呂原之蔭叨授此官而

反欲屈身就試下泯先澤上負國恩苟圖今日科舉之榮預為他日陞遷之地而禮部尚書朦朧奏請俱宜究治上曰朕念憲儒臣之子有志科目特允所請不為例
典史承差等入試例

正統八年雲南道監察御史計澄等奏開科取士其在京如遇稱係軍生并各衙門吏典承差人等不繇學校不經考驗其間奸盜貪墨無所不有此等之徒一體不許入試庶革奔競之風下禮部議如澄言上曰求賢之

路不許阻塞生員儒士軍民還著提督學校御史考察
入試其吏典承差人等禮部嚴切考察果通經無過犯
俱容入試仍移文原籍勘實如有虛詐論罪不宥

處置科場落卷

正統十年陝西耀州儒學署學正事舉人康極言科舉
之設誠選賢圖治之盛事也今各處考官止將中式文
卷批附各生謄照其不中式者不發中間亦有文卷無
疵考官忽畧而不取其應試生員亦有不成文并曳白

者乞勅今後科場不中之文卷并不成文曳白卷俱付
提調學校僉事等官詳校如文卷無疵考官忽畧不取
具奏逮問其不成文并曳白者按臨各學給與本生曉
諭其失量施責罰如此則為考官者不敢忽畧而不中
生員知所改正不成文并曳白者不敢萌倖進之心矣
上命禮部集議以聞

經房不用帶考

景泰元年順天府府尹王賢奏今年該鄉試往者各處

取正考試官二員同考試官四員或三員臣以五經宜用考官五員若他經官帶考一二經則去取文字豈無謬悞且會試受卷彌封謄錄對讀等官俱用在京郎中員外主事分管俱能通曉三場中間豈無受業及同鄉親屬乞令該部計議今後在京在外鄉試取同考試官五經務要五員專經考試不用帶考其會試謄錄等官移文吏部取聽選官借用如此則奸弊可革科目得人從之

增兩京經房

天順三年順天府尹王福言今年八月本府鄉試看得
應試生員春秋禮記二經數少詩書易三經各有四五
百卷若各以同考官一人校閱慮恐涉獵不詳而有玉
石不分之弊乞令禮部將詩書易三經每經添同考官
一員上從之仍命南京亦照此例

增經房員數

成化十七年禮部言二月初九日會試天下舉人合用

同考試官舊易春秋禮記三經各二員書詩二經各三員緣今書詩二經試卷加多乞每經各增一員上曰科舉取士務在得人使鑒別不精寧免其無濫進者乎今詩書卷比前科加多而額數有限可每經增同考試官一人庶得詳於校閱而人才無遺也

考試官隆賓禮

弘治四年禮科給事中林元甫等言各處鄉試所請考試官多不得其人致去取悉從外簾甚至為監臨等官

所斥辱甚非賓禮儒臣之意今後請令巡按監察御史
各會同京府并布政按察二司先期移文各處提學憲
臣擇有學行者行聘御史等官以禮相待除私弊糾察
外其文章純駁悉聽去取不許考立簾外五經官以奪
其權如考官取士不足服人并罪其原請者禮部覆奏
宜如所言上曰今後鄉試務遵依定制事該簾內官管
理者簾外官不許干預

雲貴合試

弘治七年十月貴州守臣奏本布政司生員舊於雲南
布政司鄉試其試錄止名雲南鄉試錄所取舉人名數
通四十五名今請於本處開科以免合式增解額以激
士心禮部議謂舊制不可改止擬改試錄為雲貴鄉試
錄及稍增解額名數上從之命雲南增舉人二名貴州
三名

太醫院子弟入試

弘治十年十一月太醫院使王玉奏本院官并醫生醫

士子孫弟姪凡有諳習舉業者例得應順天府鄉試近給事趙竑奏止許食糧當差醫士醫生應試而子弟不得復與進用人才不宜故為是阻隔也乞如舊便禮部覆奏得旨命凡冊內有名者許仍舊入試

申飭訪取試官

正德八年六月廣東道監察御史楊時周言國家每三年取士除兩京外其浙江諸省主考官類以教職充之濫竽者不少自今宜於兩京進士出身官員內訪求才

學為士類攸歸者往膺主考之任庶得真才章下禮部覆奏謂舊制未可盡更且諸省鄉試校文雖屬於教官而監臨實統於御史請申飭巡按通會布按二司預訪教職有學行者以禮聘之不勝任者御史糾舉則舊制不失而真才可得矣從之

京省鄉試別議考官

嘉靖五年署都察院事兵部左侍郎兼學士張璁條陳
慎科目三事

一正文體請令主司校文務取平正爾雅有裨實用仍於周禮儀禮中出策一道使之習於禮樂然後責以事君使民

一明實錄言鄉會試錄宜取生儒原卷稍增損一二字不必盡出已筆分考校之功

一慎考官言各省鄉試宜如兩京事例擇翰林院科部官為之主考毋令權歸外簾得以預結生徒暗通關節上深善其言令所司如議舉行各省鄉試主考令禮部

舉京官或進士每省二人馳往供事監臨官不得叅預
內簾兩京鄉試主考外五經房仍令各加科部官一員

會試三事

嘉靖十一年禮部尚書夏言以歲當會試條奏科場三
事

一變文體以正士習言近年以來文章日趨卑陋往往
剽剽摹擬國左等書以相矜眩不過以艱深之詞飾淺
近之見用奇僻之字蓋庸拙之詞而純正博雅之體優

柔昌大之氣蕩然無存自皇上登極以來屢渙德音黜
浮崇雅乃昨歲天下進呈錄文數皆猥鄙不經氣格卑
弱背戾經旨決裂程式其刻意以為高者則浮誕譎詭
而不協於中騁詞以為辯者則支離磔裂而不根於理
文體大壞比昔尤甚今年望勅考官務取淳正典雅溫
柔敦厚之文一切駕虛翼偽鉤棘軋茁之習痛加黜落
庶幾士知所向文體可變

二責主司以定程式言應試之士較于風簷之中欲實

錄其文可為程式者蓋已絕無間有所以試錄文字多出主司之手而兩京會試皆館閣儒臣所為足為海內矜式近今錄士子本文不必考官自作所以各省試錄文理紕繆體裁龐雜乞令考官今次會試所命三場題目俱要冠冕正大有關理道不許截裂牽綴徒事帖括及困以隱僻有如覆射若士子可錄之文仍令考官重加裁正以示模範

三簡考官以重文衡言同考官例用翰林院講讀官十

一人給事中三人司屬三人今本院自侍講已下通得十一人則當盡數入場方足供事乞勅內閣於科部六人之外再訪三四人以補翰林不足之數疏入上報曰文運有關國運所係不細近來士子經義詭異艱深大壞文體誠為害治其出榜曉諭今年會試文卷必純正典雅明白通塗者方得中式若有仍前鉤棘奇僻痛加黜落甚則令主考官奏聞處治餘依擬行

請寬京考官數目

嘉靖二十四年部覆科道條陳乞遇兩京鄉試題遣主考官寬其數目如翰林院春坊中允贊善講讀官少即於修撰編修內共擬數員上請點用以絕士子窺伺之弊

就近鄉試

嘉靖十年十月本部題該遼東都司等衛儒學生員徐潮等奏要改赴順天府應試等因本部看得遼東都司衛學應試生員先附山東多係緣海道之便今海道既

塞陸路遼遠往返正有六千餘里貧生寒士裹糧挾策奔走長途動經數月委於人情不便今欲改附近順天府應試又與潼關之附陝西宣府之附順天事體相同况節該衛學生員徐潮等陳奏頻煩情詞如一似應俯從但係奏改就近科舉地方既已更屬解額未免有拘臣等查得近該直隸提學御史胡明善題稱德州等衛提學教官皆屬山東惟生員乃為提學御史所轄乞要建學起貢等因該本部題覆奉聖旨是依擬行欽此已

經行令欽遵去後今照遼東衛學遠去山東六千餘里
乃使越過順天而附山東科舉德州左等衛學本是山
東地方而科舉反附於順天事體人情通屬未便相應
議處臣等合候命下行移山東布政司及咨都察院轉
行直隸提學并遼東巡按御史知會今後德州左等衛
儒學聽山東提學官管轄就山東布政司應試遼東科
舉生儒遼東巡按御史考送順天府鄉試其德州等衛
建學起貢事宜本部移咨都察院改行山東巡按御史

查照先奉欽依事理施行則不惟解額無拘而人情事體兩得便益奉聖旨是依擬行

順天增巡城御史檢閱

嘉靖四十年以近歲科場弊多詔增拓舉場前地令生徒便於出入官校便於防檢其臨入試時除監場御史外增遣巡城御史二員先於場門檢閱以進著為令

監生官恩生應試特例

嘉靖十四年十一月內禮部題該南京國子監祭酒費

案奏照得近年遵奉詔旨精選歲貢生員到監作養以
脩不次擢用立賢無方人知感奮緣各生多是妙年英
俊而京闈取中有限其在歷期滿日各衙門既嚴勒還
鄉原籍提學又不肯多取監生應試是諸生歷滿之後
無復科第之望矣以故滿監率多託病遷延甚至私自
逃回不顧虛曠雖經決罰猶循故常如蒙俯念許令歷
滿還鄉之後凡遇鄉試在畿輔者畿輔巡按御史收考
應試在各省者各省巡按御史收考應試庶使人有定

志不擾監規再照官恩納銀生員中間空疎荒謬者固
多亦間有經生宿學久困鄉校未友善士以廣見聞抑
或初雖失學後經琢磨亦知奮勵故納銀生員中如見
任吏部侍郎羅玘發解之後往往踵武相繼而官恩生
員中間有多發身賢科不可謂盡無人也但官司多以
富賄而起嫌疑又以儒素而槩輕忽較之選貢生監推
抑尤甚以致遷延規避滋紊條約如蒙歷滿鄉試之年
隨處巡按御史收考精選入場則不惟監規可齊而國

家作人之方益廣矣等因具題該本部議得各處歷滿
監鄉監生官恩生并納銀生員其間豈無豪傑之才若
遇鄉試之年不令入試未免有遺賢之嘆今費寀具奏
前因相應依擬覆奉欽依移咨都察院通行南北直隸
并浙江等布政司如遇鄉試之年將歷滿在京監生官
恩生并納銀生員許彼處提學官按歷地方與在學生
員一槩嚴加精選如果文理平通錄取入試不許聽受
囑託將文理紕謬不堪者一槩濫送

請精擇考官

嘉靖二十四年禮部覆南京給事中萬虞愷等條奏科場事宜請會試及兩京主考翰林官內盡數開列及部院官亦多擬上候點其各省鄉試精聘教職不足則聘外省推官知縣等官入內簾主事外簾不得有所干與印卷封號須加詳慎入場唱名給卷印號登時彌封奸人不得措手以杜關節得旨會試及兩京考官宜遵舊制餘如議行

試約

申飭鄉試用考官

正統六年監察御史丘俊奏江西鄉試小錄刊舉人胡
皞易經家人卦彖辭義九五陽剛訛作六五柔順考試
官禮部主事林璧湖廣岳州府通判林文祐同考官浙
江鄞縣儒學致仕教諭錢縉俱合治罪禮部請斥皞回
原學肄業待下科再試并言舊例同考官止請四員今
湖廣江西廣東山西山東陝西皆多一員福建多二員

湖廣鄉試小錄自增知貢舉官二員事屬僭妄宜通行
禁革上從之命今後考官必求文學老成行止端莊不
許將六十以上及致仕老病與署事舉人年少新進學
力未至者舉用違者從風憲官糾劾治罪

試題犯王諱

正統十二年丙申禮部奏山西布政司正統十二年鄉
試小錄所出詩經題內維周之楨其楨字犯楚昭王諱
不曾迴避考試官學錄郭明郁教諭吳驥同考試官知

縣黃子嘉提調官左布政使石左叅政朱監試官按察使林文秩僉事黃文政俱應問罪上宥之但令巡按監察御史取各官罪狀考試及同考試官俱罰俸一月提調監試官紀錄還職仍移文申諭戒無再犯

陳入試人禁例

景泰三年禮部祠祭司主事周騏奏設科取士當遵國法禁例洪武以來舊制曾繇科目出身未入流品官生員發充吏罷閒官吏監生生員倡優隸卒刑喪過犯之

人不許入試其生員軍生儒士及未入流品官農吏承
差軍餘人等若無錢糧等項粘帶者聽從入試如有不
遵照例論罪已中式者斥退不錄未中式者終身不許
入試今順天府景泰四年鄉試取中舉人尹誠汪諧陳
益龔匯王顯李隨李森錢輪俱係冒籍人數於例不該
入試似此之徒欲求事君而先欺君今日苟圖如此他
日居官可知乞明正其罪以警將來命錦衣衛俱執送
刑部問未發露者許出首逮問同學知而不首者同罪

今後科場知貢舉監試提調等官務在防範嚴切不許容情冒名換卷截卷傳遞文字并說話作弊監門搜檢巡緝監試官軍敢有如前容隱不舉作弊者俱治以重罪簾外執事官臨期於吏部聽選官內選文學出身者充之詔舉人尹誠等十二人冒籍下錦衣衛獄鞫罪終身不錄用至是禮科都給事中張軾等言立法不可以不嚴待人不可以不恕貴乎張弛得宜而輕重適均也竊此冒籍等人因多避難就易欲希僥倖然亦有因地

里遙遠盤費弗給而不能回者有因從親在外生長不識鄉里而難以回者是以冒籍鄉試以圖出身冀得升斗之粟以為養親之需其初心不過如此其所犯亦非甚重今既問罪而不容會試固為當矣至若終身不許錄用則將終為罹罪之人竟無自新之路待人無乃未恕乎乞勅禮部通查此等冒籍之人已經問發者給引照回原籍如遇開科鄉試仍許本地入場如此則犯小過者得以自新負才藝者不終至於阻抑矣從之

出題禁割裂

天順三年浙江温州府永嘉縣教諭雍懋言朝廷每三年開科取士考官出題多摘裂牽綴舉人作文亦少純實典雅比者浙江鄉試春秋摘一十六股配作一題頭緒太多及所鏤程文乃太簡畧而不華實且春秋為經屬詞比事變例無窮考官出題往往棄經任傳甚至叅以己意名雖搭題實則射覆遂使素抱實學者一時認題與考官相左即被黜去乞勅自後考官出題舉子作

文一惟明文是遵有弗悛者罪之上善其言命禮部議
行

題行鄉試條約

嘉靖十二年定節年題准鄉試條例本部每遇鄉試先
年八月通行各省知會遵守

一各處鄉試該用考試官布按二司務要會同巡按御
史從公訪求學問老成行止端謹之士以禮聘取不許
徇私將年六十已上并到任養病見在府州縣官及不

由科目出身教官聽從囑託一槩濫請亦不許越數多
請若所請考官遇有事故許原差人赴所在提調學校
官處改請相應教官各將舉到試官開坐舉主職名隨
小錄咨呈本部若請非其人罪在舉主

一簾外執事官照依舊例取用不許過多其順天應天
二府官員不拘是否入院共事弟男人等俱不許朦朧
入試以致夤緣中式

一試官所出三場題目提調監試官俱不許干預其題

目務要依經按傳不許偏生小說意外鑿空摘裂牽綴
有失本旨及問非所當問干犯迴避字樣

一場中所作文字俱要純雅通暢不用浮華險怪艱澁
之詞策答不許引用謬誤雜書陳及時務須要斟酌得
宜便於實用不許泛為夸大及偏執私意有乖醇厚之
風俱遵照本部題准正文體事例著實舉行

一應舉生員并儒士人等俱要本府州縣并衛所申送
提調學校并遼東巡按御史先行嚴加考試中者方許

入場不得將不熟三場初學之士及外處人民假以贅壻等項冒濫入試虛費供給亦不許仕宦子弟於父母原任衙門移文起送其各生有重冒古今顯著姓名責令改正方許入場

一文章純駁悉聽考官去取不許巧立外簾五經官干預考試官

一所取舉人止憑文字高下去取不得論其地方中式多寡臨時徧徇進斥以廢公論

一考試官如有徇私作弊仍從監臨等官糾舉

一小錄文字務將文理平正者錄出不許監試提調等官各逞已能分派代作及將舉人原文改作刊刻其書寫刊刻要字畫真楷用黃綾壳裝潢黃二本紅四本俱用紅黃綾袱包裹太后中宮東宮仍備紅綾壳錄六本試畢同將本部備照小錄作速差人馳驛送部

一小錄書板照本部會試錄式樣不許仍開掌行科舉文字吏及謄錄對讀生員姓名

一小錄序文內考試提調等官各開官職姓名不許稱
臣并知貢舉字樣名目如會試錄例又不許稱張公李
公字樣所給公據各要粘連三場文字仍將舉人的確
年歲籍貫經書備開咨呈與備照鄉試錄一同送部以
憑查對毋得增減年歲及遺漏不報

一各處進到小錄本部照依前項事理逐一叅詳如有
故違及差謬等項通行叅奏究治

一查得近年有等無籍之徒瞰遇科舉生儒入場之時

預先挾讐告害及投粘匿名書帖陰謀駕害報復者不許輕信如或牽告在官審果不係緊關對證者亦待科場畢日問理毋墮奸計以息刁風

題行會試條約

成化二年正月禮部奏設科取士期得真才以資任用然每歲會試雖有禁約舊例而行之日久不能無弊臣等更議事宜條示申明敢具以請

一舊例考試等官於初八日蚤入試院一日之間事務

多端整頓不及宜預於初七日早入院為便

一舊例就試之日舉人黎明入場黃昏納卷有未畢者給燭三枝燭進文不成者扶出今士子比昔倍蓰中間多有故意延至暮夜請燭之時抄寫換易或有棄燭於席舍中而他出因而誤事者最為可慮宜於四更時搜入黎明散題申時稿不完者扶出若至黃昏有謄真一簾或簾半未畢者給與燭

一舉子入場務要嚴加搜檢放入就舍坐待題目文成

二篇之上者方許入廁即隨還舍不許交接講論若有懷挾及浼官軍夫匠人等夾帶文字入場埋藏抄寫并越舍與人互換者搜尋捉獲得出并發充吏其官軍夫匠人等為帶文字縱容懷挾又容越舍互相抄寫不行覺察捉拏者問罪軍調邊衛官罰俸一年夫匠發口外為民

一巡綽搜檢看守官軍止于在營差撥其曾經差者不許再差若他人冒頂軍名入場看守者民發充軍軍調

邊衛

一提調監試官不許私自入號務要公同往來巡視其巡綽官止於號門外看察不許入號與舉子交接違者聽提調監試官叅奏拿問

一舉人入場之後牆外例該五城兵馬指揮等官率領火夫弓兵分地看守以防不虞近年各城兵馬視為泛常或致慢事今後各城務委的當官率領火夫弓兵牌帶什器環牆四面嚴加防守不許擅離怠慢慢事違者叅

奏拿問

一每場謄錄紅卷送入簾內老閱候三場畢考閱紅卷文字已定方許弔取墨卷送入簾內於公堂比對字號不許散入同考各房誠恐收拾不謹遂致疎漏

一謄錄生員務要用心逐字真正對寫不許差訛失落字樣潦草不真對讀所亦要對得明白不許含糊苟且若謄錄差訛失落字樣潦草不真及對讀不出者生員發充吏役該管官送問

一膳錄對讀收卷等項官舊例用京官今行吏部取聽
選官充之緣中間多有年老眼昏及無行止不堪任使
今後務要精選四十歲以上下五品至七品官有行止
者令各執事庶幾事可責成

一供給飯食順天府官多有造作不精供給失節士子
嗟怨合無本部另差官一員專一提督供給奏上上從
之

嘉靖十年禮部題准節年會試條例

一試官不得將帶弟男子姪親屬入試徇私取中違者
許諸人指實陳告

一舊例就試之日許令舉人黎明入場黃昏納卷有作
文未畢者給燭三枝燭完文不成者扶出緣今士子比
昔不啻加倍中間多有奸詐之徒往往故意延至黃昏
請燭之時乘機混雜謄寫懷挾換易文字甚有棄撇燈
燭於席舍之內走求他人因而悞事合於四更時搜入
黎明散卷申時初刻稿不完者扶出其謄寫正卷至黃

昏如有一篇半篇未畢者給與燭一枝再不多與

一舉人作文依例迴避御名廟諱及親王名諱如有違犯定行斥落惟二名不偏諱

一考試官及簾內外官各帶不識字從人一名役使不許縱令出入

一試官入院之後提調監試官封鎖門戶不許私自出入如送試卷或供給物料提調官監察御史眼同開門出入即便封鎖

一舉人作文字畢送受卷官收受類送彌封官撰字號
封記送謄錄所謄錄畢送對讀官對讀畢送入簾內考
閱

一搜檢懷挾凡遇每場舉人入院把門官軍一一搜檢
除印過試卷洪武正韻筆墨硯外其餘不得將帶片紙
隻字如是搜檢得出即時扶出仍行移本貫再不許應
試及冒名入試者定行奏聞區處

一巡緝官凡遇舉人入院竝須止約不得喧闐如已入

席舍常川巡綽舉人不得私自交談互相講論及巡察簾內外官不得漏洩事務

一受卷所置立文簿凡遇舉人投納試卷陸續關發彌封所就於簿上附名以憑取勘入試人員數目其舉人納卷未了不許先行歇息及遺失試卷

一彌封所先將試卷密封舉人姓名用印關防仍置簿撰定三不成字號編排資次照樣於各經卷首號寫明白不許點畫相同及漏洩作弊

一謄錄所受到試卷硃書字號并所作文字務要用紅筆謄錄相同於上附寫某人謄寫如是不行真楷以致錯訛及脫漏添換許對讀官劾舉照謄寫人名究治

一對讀所官受到試卷務要將紅字卷墨字卷對讀分明於後附寫某人對讀無差不許差訛有妨考校

一供給官合用心紅筆墨紙劄梨木板并刊字匠刷印匠先期辦完候用其簾內外官并舉人執事等廩饌務要精潔其吏胥里甲供應人等出入竝仰守門官軍用

心搜檢毋得透漏試題及暗遞文字

一舉人入試之後其在外諸色人等毋得輒入窺探事情違者許把門官軍捉拿赴官治罪

一撥到搜檢看守軍人本部委官先將各軍人搜檢沿身別無夾帶方許入院如是將帶片紙隻字誣舉人者捉拏到官定行奏聞區處

一提調官監試官不得干預考試卷

一舉人用墨筆書寫試卷謄錄對讀官受卷皆用紅筆

欽定四庫全書

禮部志稿
卷七十一

考試官用墨筆批點竝同關防用墨處竝不用心紅用心紅處竝不用墨毋容混同

一舉人試卷自備三場所用筆墨并正卷草卷各紙一十二幅於卷首書寫三代籍貫年甲及所治本經赴部印卷外更不得於正卷前後重寫姓名籍貫違者究治一圖畫東西行席舍間數編排開寫舉人照依編定字號姓名并所治本經相間入坐毋得攙越錯亂違者治罪

一舉人文字題目之上不許私加奉試字樣文字中間
不得自敘辛苦門第謄錄點檢如有似此違犯者許掌
試提調官監察御史看過更不謄錄其正卷內務要真
楷書寫草書有碍謄錄

一舉人入場務要嚴加搜檢放入就舍每用軍一人看
守坐待題目到手文成二篇之上者方許出恭隨即還
舍不許交接講論若有懷挾及洩託官軍夫匠人等夾
帶文字入場埋藏抄謄并越舍與人互換寫錄者搜尋

捉獲得出并發充吏其官軍夫匠人等替帶文字縱容夾帶及容越舍互相抄寫不行覺察捉拏者問罪軍調邊衛官罰俸一年夫匠發口外為民

一巡綽搜檢看守官軍止於在營差撥其曾經差過者不許再差若他人冒頂正軍入場看守者民發充軍軍調邊衛

一提調監試官員不許私自入號務要公同往來巡視其巡綽官員止於號門外看察不許入號舉人交接違

者聽提調官監試官叅奏拿問

一每場謄錄紅卷送入簾內於至公堂比對字號不許流落同考各房誠恐收拾不緊遂致疎漏不便

試卷犯諱差謬

成化十三年詹事府少詹事兼翰林院侍讀黎淳奏科場出題作文定式洪武年間已嘗頒降近年有司多有不遵任情行事所刊程文除兩京外其餘純粹者少駁雜者多甚至犯廟諱及御名乞移文所司將提調監試

并考試同考試官究治考官如例追奪表裏仍查墨卷如舉人自錯退還原學及小錄前列吏典掌行科舉生員謄錄對讀兩條亦當削去申明科場舊制頒降學校永為遵守有旨科舉重事各處題刊文等事何為違式差謬該部會官查究明白以聞禮部會同翰林院等衙門學士等官覆奏成化十三年鄉試錄浙江等布政司中有犯廟諱御名及親王諱其嫌音及偏犯一字者如例不坐外其犯二字及文理差謬行文有疵表失平仄

字畫差錯者宜如淳言究治但犯親王諱及文疵平仄不順字畫差錯比與文理差謬者不同宜止治其罪仍令舉人會試如錯改其文止罪考官後會試鄉試開科取士凡遇御名廟諱下一字俱要減寫點畫以盡臣下尊敬之道餘皆如禮部奏行條件考試等官務取學行老成之士不許徇私濫舉及越數多取出題校文并刊錄文字必須依經按傳文理純正不許監臨等官干預其考試官如有徇私作弊仍從監臨等官糾舉簾外執

事如舊例取用小錄刊板如禮部會試錄式不許仍開掌行科舉文字吏典及謄錄對讀生員姓名從人

聘考官不得徇私

成化十四年御史許進言國家以科目取士慎選考官甚為詳備近各布政司每遇開科輒徇私情所聘以為考試及同考試官者多非其人以致校閱不精有遺才之弊竊見兩京俱命翰林官主試故所取得人乞各布政司亦如兩京例命翰林官主考為是上諭禮部臣曰

布政司鄉試自聘主司乃祖宗舊制行之已久許進何得具奏欲改之且科目選賢國家重事若聘主司徇私作弊無往而不為奸利矣爾其行令巡按御史并布按二司今後敢有作弊者令互相糾舉或爾部中詳看體訪得出奏來必重治之

奏革科場弊

弘治四年巡按直隸監察御史王鑑之言臣奉勅提督南畿學校嘗聞南京科場之弊明年又當鄉試不先革

正將恐奸偽益滋惟南京應試士人除百二十三處學校外又有國子監生及諸司歷事聽選官吏儒士輩進途既廣弊端多生而貢院規模窄狹四面皆居民樓房圍繞登高窺覷乘暗投擲巡綽難于關防懷挾易于進入况受卷彌封等所俱在至公堂上內簾上隔一板壁聲息相聞舉動便覺積年以來富貴子弟多方營圖有買求編號將有學生員置在左右代作文字者有請託執事官吏截人文字易以己名者有三更不出潛入別

號求人改作者有先藏舊文在內而臨時取出謄寫者
巡綽官軍多徇情弊不舉近又增府官一員進入內簾
科場一應公事俱屬此輩豈不傳遞消息名曰革弊其
實生奸故榜未揭而物色已遍榜既揭而議謗交騰凡此弊
端臣恐不獨南畿為然乞勅禮部看詳行南京都察院
凡差監試御史務求剛正老成之人其應天府提調并
一應執事官亦必慎擇公廉端謹之士痛革宿弊貢院
牆垣并受卷等所宜增高加棘克廣遷移以杜弊源仍

移文各布政司一體禁革則真才可得而謗議自消矣
命禮部知之

議處簾內外責成

弘治十六年禮部奏明年各布政司當開科取士欲申明所司知之上曰科舉重事邇者各布政司舊規廢弛考試等官多不得人簾內簾外混淆侵越弊出多端宜查原定條格議處畫一以聞於是禮部具言我祖宗科場條貫之善而近年以來各布政司為簾外官者思欲

防簾內之弊往往選取府州縣官充受卷彌封等官翻
封墨卷叅定去取似與舊規不合且府州縣官未必盡
得其人將以革弊而更以滋弊今宜令慎擇試官試官
得人則為簾外者雖欲分爭侵越亦自有所不能矣命
遵照原定舊規申明禁約考試官必從公訪舉不拘職
任務在得人其有不勝任者罪作舉主簾外官有侵奪
簾內職務者事發重罪之若所刊試錄乖舛許該部與
翰林院叅究以聞

重選舉五事

正德十年南京禮科給事中徐文溥言重選舉五事

一近日主司務為譎恠命題摘掇一句二句或割裂文義或偏斷意旨宜如成化初年以前出題必章句成段義理貫屬取文必講理親切措詞淳雅其有浮艷險恠不根義理者並皆黜落各提學官亦依此訓迪諸生

二各處監場官務為苛刻屏去士子衣巾被髮趨走宜畧倣會試事體許其單衣草履稍存體顏以養廉恥敢

有懷挾加重治

三今後鄉試除同考官照舊行令提學考選教官應聘
其主考不拘官職務令博訪素有名望操持廉正遽於
經術者往蒞其事

四近年場屋之權一歸御史二司倪仰承風考官局縮
聽命五經分校於各所去取一聽於監臨且據所習之
經以為所舉之首或用字號以示內簾或進簾內以諭
已意或臨榜而執卷請填或割榜而私自換易為弊多端

所害不少今後御史專令糾察奸弊毋得仍前侵奪有違舊制或專恣聽考官指實陳奏二司互相糾舉吏部嚴加訪察黜之示戒

五近時時文流布四方書肆商人藉此以賈利士子假此以僥倖宜加痛革凡場屋文字句語雷同即係盜竊不許謄錄其書坊刊刻一應時文悉時燒燬不得鬻販各處提學尤當禁革如或私藏誦習不悛者即行黜退疏入下所司知之

條陳科舉事

嘉靖十年禮部覆都給事中張潤身條陳科舉事

一杜詐冒以端趨向監生三月以後到監及到各衙門
補歷者不許考送仍行北直隸督學御史明覈在京生
儒鄉貫冊籍

一革小考以節勞費各省督學往往多取名數臨期集
省城聽巡按御史覆考名為小考此於生儒勞費不便
一處考官以絕私嫌各處同考試官聘取徇私宜令督

學先廡所屬教職年壯行端者糊名考選類造手冊分經編號下實其姓名官籍自存備照別置一冊不書名籍第以所編字號密切鈐封送巡按處以待隔省來聘旋填姓名官籍或應迴避則用次人以次應聘其預泄私通及濫舉充數者聽御史叅究詔如議

禁流移附籍入試

嘉靖二十二年禮部言國家開設賢科兩京各省三年大比各簡其士賢者多貢禮部禮部合試之簡其賢者

對制大廷以供中外百司之任所係甚重夫人才之生
其地者多寡不同故解額因之而異至於會試則分南
北中卷取之各有定額所司不得增損奈何法久禁疎
遂有遊學矯詐之徒見他方解額稍多中式頗易往往
假為流移冒籍入試至有脫逃罪犯變易姓名奔走營
求靡所不至至于會試舉人報籍印卷亦有假託族屬
改附籍貫朦朧開具以南作北國法罔存士風大壞乞
於明年會試嚴加覈究但係先年冒籍嘗經恩赦者許

其首正其他籍貫不明妄報中卷北卷者本部指名叅
退仍行兩京各省凡遇鄉試開科提學考選生儒不得
將流移附籍之徒一槩濫收以玷科目違者奏請治罪
報可

飭鄉會廷試法

嘉靖二十四年禮部議覆給事中胡叔廉鄭大同奏科
場事宜

一關防考試謂兩京主考需次差遣則易於窺伺用鄉

土之人則多招物議各省鄉試之弊則又在提調監試與各供事官得相接也宜禁革之

一飭鄉試之法謂各省鄉試以權歸外簾故弊端滋多遂使禮聘考校徒寄空名糊名易書竟成虛典此教職權輕之所致也宜照兩京例以京官主考

一飭會試之法謂監試御史不過防範於外故內簾之弊無從糾察而散卷等官始得以徇私分送故內簾亦宜置監試官一員

一飭廷試之法謂廷試閱卷往往以官之崇卑定卷之高下以故送卷官得以高下其手宜勅下部臣痛釐風弊監試御史二員專意防範使人不得以行其私得旨取用考官并內簾散卷官俱照舊規行不必紛更其餘如擬

京省試革弊事宜

嘉靖四十二年禮部覆南道御史官所陳兩京鄉試革弊事宜

一今後兩京主考不用本省人如資序挨及南人用北人用南以別嫌疑

一同考用京官進士出身者易詩書各二員春秋禮記各一員其餘參用教官以便覺察

一謄錄用書手對讀用生員以防洗改但此三事專為兩京鄉試而設其各省及會試亦當因其說而廣之因更上六事

一會試及兩京鄉試官預於二十日以前選差以便防

範

一巡視搜檢務加嚴慎以杜奸弊

一各省務精選才望內簾官無令外簾干預去取

一申明各處科舉名數照原定解額每舉人一名取應舉生儒二十五名

一中式之文務存簡實凡浮靡冗雜詭僻不經悉行黜汰仍參取後場以來實學

一解原卷到部以憑稽查不用公據得旨各省鄉試但

照舊規令監臨公同考官揭書出題提調監試等官不得干預餘皆如議行

慎選考官

嘉靖元年正月內禮部題為嚴選考官以圖得人事該監察御史向信題稱各處鄉試考官聘取之時巡按多執已見或因親朋不論老耄荒疎輒行聘取以致取人不真乞要慎重選取等因本部覆奉欽依通行各省巡按御史今後聘取考官及考官取士悉照本部節年題

准舊例施行

申飭科場六弊

隆慶元年禮科給事中何起鳴奏申飭科場事宜一曰重懷挾之罪二曰革傳遞之奸三曰慎同考之選四曰正諂諛之風五曰預監臨之差六曰嚴誣騙之罰疏下禮部覆奏得旨懷挾傳遞諸弊依擬枷號重處今後科場搜檢不嚴關防不密責在外簾舉動不慎校閱不公責在內簾禮部都察院分別叅奏餘悉如議行

隆慶二年正月河南道御史王好問條陳科場四弊一
號舍二懷挾三代替四透漏俱宜嚴法關防禮部覆奏
上曰奸弊不祛何以得真才監試御史其盡心嚴察不
得寬縱



禮部志稿卷七十一

欽定四庫全書

史部
禮部志稿卷七十二

詳校官監察御史_臣龔驤文

編修_臣程嘉謨覆勘

總校官知縣_臣楊懋珩

校對官助教_臣羅萬選

謄錄監生_臣趙興文

欽定四庫全書

禮部志稿卷七十二

明 俞汝楫 編

科試備考

解額

定科舉額

宣德元年行在禮部奏定科舉取士之額先是仁宗皇帝以為近年科舉太濫命禮部翰林院定議額數至是

奏議凡鄉試取士南京國子監及南直隸共八十人北
京國子監及北直隸共五十人江西布政司五十人浙
江福建各四十五人湖廣廣東各四十人河南四川各
三十五人陝西山西山東各三十人廣西二十人雲南
交趾各十人貴州所屬有願試者於湖廣就試禮部會
試所取不過百人上曰南士取十之六北士十之四大
抵國家取士為致治之本其冒貢非才蓋有司之過人
既苟得遂起偉心今解額已定果行之以公不才者不

得濫進自然人知務學其令各處凡考試官及諸執事
先須擇賢庶免冒濫

增鄉會試取數

正統五年祭酒陳敬宗言比者解額有定副榜數少以
致天下教官類多缺員吏部遂建議兼考監生補除教
職往往僥倖選列不稱師範竊以為縱科舉取人之濫
猶愈於監生考試之精請量寬解額專取之於副榜庶
幾誨導得人賢才無滯於是吏部議增會試為百五十

人順天府近已增至八十人其應天浙江等處各增舊額有差上定為應天府百人浙江福建皆六十人江西六十五人河南廣東皆六十人湖廣五十五人山東四川皆四十五人陝西山西皆四十人廣西三十人雲南二十人其監生學業無愧仍除教職

請限進士數

景泰元年巡撫直隸大理寺左寺丞李奎言往年進士多為解額所拘未免有滄海遺珠之嘆皇上統御之初

廣收賢才用圖治理乞令禮部會議今後會試天下舉人宜照永樂年間事例三場文字合程格者不拘多寡取中仍通具名數臨期奏聞定奪庶有學之士不為定額所拘從之

雲貴增科額

成化二年貴州左布政使等官蕭儼等奏雲貴二布政司儒學共五十餘所而科額共三十名貴州止得十名宜量增名數以勵士氣禮部覆奏准鄉試舉人量加增

十名貴州六名雲南四名

雲南增解額

成化十年增雲南鄉試舉人五名先是總兵官黔國公沐宗等言雲南貴州雖在邊鄙久沾聖化人才漸盛往往與中州之士聯中甲科故事鄉試止取四十名雲南二十四名貴州十六名人才淹滯教官亦難遷轉乞量增額數故有是命

請增京省解額

弘治十六年南京吏部尚書林瀚等以災異陳言一增
廣賢才今賢才日盛而學校作養不為無人但科舉解
額有限英俊之士或未能盡收臣瀚前任祭酒時已嘗
奏請兩京鄉試每科乞增十五名浙江等布政司各增
十名未蒙准行乞勅禮部計議加增鄉試舉人名數以
廣賢路命下其奏於所司

貴州設科解額

嘉靖十四年八月內禮部題該巡按貴州監察御史王

杏等題據貴州宣慰司貴前二衛致仕官孟震等呈惟
我朝取士開科惟貴州附搭雲南兩省隔越山菁險阻
赴試之時溽暑瘴厲正甚往者隱處居者積慮構病遭
劫亡財喪身歷歷可數伏望採擇奏聞一體設科拯救
士子無限之苦等因抄呈到部為照我朝設科取士內
而兩京外而浙江等布政司每三年一舉其解額之衆
多視人才為差等先年以廣西貴州人材缺少故將廣
西附搭廣東貴州附搭雲南後廣西因人材漸多奏准

另開科惟貴州仍附搭雲南鄉試節該彼處撫按官具題止量增額數近年該給事中田秋建議本部以未經查勘有礙擬請又恐人材未充地方不便支費不貲行令查議去後今該地方巡按御史王杏備細勘報前來臣等看得貴州雖與雲南接壤而山勢險絕道里遐渺盜賊出沒無常秋夏嵐瘴盛發以致每科應試生員跋涉衝冒多所損傷其於人情委為未便況今文教漸洽遐方絕域人材日盛每科應試之士數逾七百中試錄

文五經俱備及舉進士科不乏人近年被翰林臺諫之選者往往文章氣節與中原江南才俊齊驅但貴州地里視雲南稍狹故學校之數差少今於應試七百人中取原定解額二十一人則貴州一省自可成錄況貴州雖附雲南而科舉坊牌之費該省自辦鹿鳴之宴該省自舉所議增者止建立貢院并三場供給試官聘禮耳今既查有省城南隅空閒分司堪立貢院估計用銀二千八百餘兩而在庫堪動官銀實有三千一百之數

及增聘禮供給等費亦不過五百餘兩則財力未為不敷况係聖朝興文盛典事理可行所據本官勘報事情相應准議合無行令撫按官會同都布按三司即便動支前項無礙官銀於議定舊址建立科場依期開設鄉試以備一省賓興之制但不許因而大肆科擾於民其原定鄉試解額雲南三十四名貴州二十一名今二省人材比昔倍盛伏乞聖裁每省均賜加增三五名尤足以昭一代文明之盛奉聖旨是雲南鄉試解額准取四

十名貴州二十五名

湖廣貴州增解額

嘉靖十九年巡按湖廣御史姚虞題為應時增科以作興文教事本部覆議湖廣歲額舉人八十五名其承天乃陛下本原之地乞要增加解額等因題奉聖旨湖廣朕皇考德化所及之地解額准增足九十名欽此

嘉靖二十五年該巡撫貴州都御史王學益巡按御史蕭端蒙各題稱貴州一省并附湖廣鎮遠等五衛儒學

近年人材益盛原定額數未足乞要酌量加增等因該本部覆題奉聖旨貴州鄉試解額准取三十名欽此

鄉試

初行鄉試

洪武三年八月京師及各行省開鄉試自初九日始試初場復三日試第二場又三日試第三場京師直隸府州貢額百人河南山東山西陝西北平福建江西浙江湖廣各四十人廣西廣東各二十五人若人材衆多之

處不拘額數或不能及數者亦從之考試之法大畧損益前代之制初場四書疑問本經義及四書義各一道第二場論一道第三場策一道中式者後十日復以五事試之曰騎射書算律騎觀其驅馳便捷射觀其中之多寡書通於六藝算通於九法律觀其決斷

京省試官

凡兩京鄉試主考官俱本府題請候抄到日本部行手本內閣點用應天府文然後覆題候旨方行手本同考

官俱本府徑自聘取十三省主考同考官俱照題准事例各布政司同巡按御史差人齎文各處聘取成化十二年十二月監察御史許進以各布政司鄉舉考試官緣徇私情所聘多非其人乞如兩京例命翰林官為是上諭禮部臣曰布政司鄉舉自聘主司乃祖宗舊制行之已久許進何得具奏欲改之且科目選賢國家重事若聘主司徇私作弊無往而不為奸利矣爾其行各巡按御史并布按二司今後敢有作弊者令互相糾舉或

爾部中看詳體訪得其人必重治之

弘治四年該本部覆議應天順天二府并南北直隸係是邦畿之內故鄉試主考之官出於上命取於翰林其各布政司俱是外藩例該各處自行鄉試主考官該布按二司會同巡按御史從公推舉以禮聘請考官遇有事故所在提學官改請相應如若各該保舉官員徇情濫舉非人以致取士不當錄文不純聽巡按御史并布按二司官互相糾舉若御史等官故立簾外五經官員

干預考卷紊亂舊規致生私弊亦聽各該考官執奏本部悉照前項奏准事例通行叅究治罪

嘉靖六年本部奏准兩京鄉試除主考照例奏請簡用禮部仍會吏部於兩京六科部屬等官內該訪舉每經一員隨考試官入院各總校本房其餘仍用教官各布政司預呈禮部亦會舉京官或進士每處二員主考監臨官不許預干內簾職事又奏准鄉試除主考官上請會舉其同考官巡按御史移文別省請取止具某經員數

不許明列姓名聽彼處巡按御史會提學官推舉開送
嘉靖十二年十月禮部題為鄉試事查得嘉靖六年該
學士張璁題為慎科目以風勵人才事節該奉聖旨各
鄉試係有司職務考官雖出欽命但近來教官多不得
人補偏救弊似亦相應況先年亦曾舉行待開科之前
數月各布政司呈禮部亦會舉京官或進士每處二員
具奏馳驛前去主考監臨官不許干預內簾職事禮部
仍急作先行各衙門及各提學道官知道欽此已經通

行欽遵外照得嘉靖十三年例該天下鄉試之期合行
照例依期鄉試但各省開科名為鄉試本係有司職務
實古今鄉舉里選之意近以京官主試委屬一時補偏
救弊之法可偶一行之若遂踵為常規似又不能無弊
況上科差出考官與巡按御史每因爭較禮部競生嫌
隙以致妨悞試事其試錄文字間有艱深奇僻不堪為
式有壞文體一切事宜俱有未便其正文體一節合無
查照本部上年題准事例申明通行移咨都察院轉行

各該巡按衙門及令各省考官務要明經取士為文必合程式毋得崇高奇詭如有不遵候試錄進呈到部之日摘其文疵叅究照例追奪聘幣其監臨提調監試等官亦要與考試官同心戮力以共成賓興重典毋或異同僨事重傷大體奉聖旨考官只用教職京官不必差正文體依擬欽此

試錄程式

凡各省奏到試錄長短難以進呈御覽本部每遇鄉試

之年通行天下遵照本部降式黃綾殼二本紅綾殼四本長一尺二寸濶六寸七分俱用陰裝數外另備六本

嚴考試教職之聘

成化二十二年禮部奏成化二十一年天下鄉試錄文多舛謬及犯諱違式乞將考試官訓導黃奎等追奪聘禮與錄文舉人衛傑等俱令御史究問然茲弊之來盖以教職易至淹滯人不樂為而就職者多非有學識之士及至聘以典文罕稱其選自今副榜舉人入監三年

及未入監者許令就教職為教職者不限年資許令會試其滿九載試中績著者許推選御史知縣凡遇鄉試所司務聘才行之士以充敢以昏老寡識曾經叅問之人蒙蔽聘用者罪有所歸奏上上曰舊制二名不偏諱犯下一字者不問其違式并提調官取招狀副榜舉人在監三年年三十以上者未入監并新科年二十五以上者俱令就職教職六年有人者許會試餘皆如議

各省考官請如兩京例

弘治八年四月監察御史曹鳳奏各處布政司所聘鄉試考官多不得人以致科場多弊請如兩京鄉試事例命翰林院一二員主考或於六科及部屬推舉素有學行者酌量地里遠近禮部臨期疏名請差其同考試則巡按御史并布按二司推舉學問優長心術純正者以充仍註舉主姓名於其下如有不稱聽翰林院官并巡按御史劾奏連坐下所司知之

罷部臣分考

嘉靖四十三年甲子歲兩京初用進士為分考官皆就近選用得人得預擬故浮議尤多而南京部臣至與主考列坐爭事不協於是禮部復以為初議不便詔今後兩京鄉試同考官仍擇文行俱優年力精壯教職充之罷部臣勿遣

遣兩京監試特早

隆慶元年七月遣御史凌儒陳聯芳監順天鄉試上以科場事重邇年多弊諭儒等悉心綜理嚴加禁革先是

兩京監察御史皆臨期方遣禮部以為倉卒之際不便防奸故是歲遣官特早

增設監試

隆慶四年禮部覆南京河南道御史王嘉賓奏請令行今後試錄第錄中式士子之文考試官稍為刪潤兩畿鄉試宜增設御史二人緝治懷挾諸弊得旨允行

會試

題聘考官

永樂七年令會試考官賜宴於禮部

景泰四年奏准會試考官翰林春坊專其事京官繇科第有學行者兼取以充教官不許

題用人員

景泰元年令會試受卷彌封謄錄對讀等官於吏部聽選官取用

成化二年令禮部官一員提督供給

弘治七年奏准受卷彌封謄錄對讀官增十六員謄錄

等生員照例除在京并通州學外順天府所屬并鄰近學選撥已冠能書生員七百名

知貢舉本部堂上官一員監試官御史二員咨都察院取用提調官本司主事二員收掌試卷官中書二員一員行內閣取用一員行中書科取用彌封官四員謄錄官四員受卷官四員對讀官四員俱咨吏部取用巡綽官四員監門官二員旗軍五千名俱行申府取用若曾經差過官員今次不許再差供給官四員精膳司主事

一員順天府委通判一員縣官二員謄錄生員咨都察院轉行提學官取用

進題官迴避

凡會試進題該本部尚書及郎中進場領出赴朝呈進嘉靖二十六年二月內儀制司郎中吳春呈有親兄應試所進三場題目及進呈例該迴避查得舊例試官不得將帶弟男子姪親屬入試其郎中止進三場題目不得該迴避本官具呈前因另劄員外進場領題

嘉靖三十二年本部尚書歐陽德有子入試止是三場
領題進呈例不迴避右侍郎閔如霖亦有子入試該充
知貢舉官例應迴避查照弘治十五年欽命吏部侍郎
王鏊入場充知貢舉官事例題奉聖旨著吏部左侍郎
程文德充知貢舉官入院供事欽此

舉人入試例

洪武十七年頒行科舉成式凡鄉試中式舉人出給公
據官為應付廩給脚力赴禮部印卷會試就將鄉試文

字咨繳本部照驗

嘉靖十年本部題准今後會試除新科舉人齋執公據外凡依親等項復班舉人務齋原籍公文并原引坐南監者執應天文引查無違碍方准收試如違一槩不准會試凡試年通行天下

題請中式

洪熙元年奏准會試取士臨時請旨

景泰元年令會試文字合格者通具中數臨期奏請定

奪

正德八年禮部議覆都給事中李鐸奏明春會試欲增取百十餘名選補州縣正官惟我朝進士之科初無定數洪武開科止取一百二十名永樂間增至四百七十三名後又減至二百五十名近年數科多三百名間有三百五十名皆因時酌取以備官使今盜平之後宜選守令托以撫綏而守令之良多出於進士宜於明年會試定擬奏請以後額數仍舊報可

嘉靖三十二年該吏部尚書萬鏜題邊方緊要腹裏疲
敝州縣舊選鄉科舉人者今得選進士以備選用乞要
加額等因該本部覆題奉聖旨照嘉靖二年取四百名
南北中分數如舊例行欽此

定南北中卷

洪熙元年奏准南卷取十之六北卷取十之四後復以
百名為率南北各退五卷為中卷

南卷浙江江西福建湖廣廣東直隸應天松江蘇州常

州徽州寧國池州太平淮安揚州廣德州

北卷山東山西河南陝西直隸順天府保定真定河間
順德大名永平廣平隆慶保安遼東大寧萬全

中卷四川廣西雲南貴州廬州鳳陽安慶徐州滁州和州
弘治二年九月南京禮部尚書黎淳言宣德間所定進
士南北中之數行之已久近成化二十三年會試以四
川左布政使潘稹言南北減二名增為中卷之數人心
不服士多怨言乞仍舊便命下其章於禮部

揭曉取辦

揭曉之日該本部尚書等官先期一日入內簾拆卷仍帶該供役吏書知印人等其主考并本部尚書侍郎吏皂各十人同考執事等官各五人各吏皂先赴司領木牌一面進場聽監試提調官點入

進呈會試錄

進試錄例用黃綾殼一本紅綾殼二本俱用銷金黃紅包袱本部尚書及郎中呈進有太后中宮東宮仍各備

紅綾殼三本俱用銷金紅包袱呈進

進呈登科錄

每科本年九月初一日儀制司郎中進朝至左順門進登科錄行一拜三叩頭禮司禮監官捧進

考庶吉士

嘉靖二十六年三十二年該內閣題請考選庶吉士題奉欽依坐名開具各衙門辦事進士該內閣擇日會同吏部禮部堂上官於東閣前考選

題行下第舉人例

送監

永樂二年據廣西等布政司潯州等府桂平等縣舉人甘摯等四十九名赴部應試緣試期已過各供阻風患病等項及查已卯卷不入試場舉人尹慎等十名各供患病不曾入試查得洪武二十四年本部將會試下第并過期未試舉人奏奉太宗皇帝聖旨下第照例未試的送國子監讀書欽此

嘉靖三十一年十二月內廣西舉人王价等告乞送監查得舊例會試下第引奏過分送南北二監肄業如上科未經引奏下科投文到部如王价等告入監者一槩不准就教

再試

洪武三十年令再試寄監下第舉人中式者次其等第除教授教諭訓導不中者為州吏目

永樂七年令下第舉人再試送國子監進學其優等者

仍賜冠帶或加俸給後令發回原籍進業

嘉靖間定凡會試下第舉人有願就教職者本部題送翰林院考試文理平通者咨送吏部選用

修理會場

嘉靖元年該順天府題科場廢壞乞要預行工部與該府四六修理本部工部各委屬官一員該府委佐貳官一員公同估勘監督等因該本部覆題奉聖旨是工部知道欽此自後每遇會試先該年各該本部具題咨行

工部與該府四六分修理

會場經費

弘治七年禮部言弘治九年當會試天下舉人而百爾
供給止取辦於京畿諸府請行浙江江西湖廣四川福
建各取鄉試所用餘銀壹百兩山東山西河南陝西及
應天府各八十兩以助其費且請執事官三員謄錄生
員二百名從之

正德八年初順天府尹楊廉奏會試之費出於本府者

居天下三分之一民力不堪乞令各布政司增數輸銀以助之禮部議增原定數至二千五百五十兩有旨令查上科所費數酌定已而本府查報多實數而間有二難據者乃不果定至是會試并登科錄進呈事竟通計用銀三千一百九十七兩有奇除見有餘數外借支本府銀一千一百九十七兩有奇禮部請以此為準派徵各布政司浙江江西湖廣福建四川各增一百二十兩并原派各共輸二百七十兩應天山東山西陝西河

南各增八十兩廣東增一百兩并原派各共輸二百兩
雲南廣西各增五十兩并原派各共輸一百兩題奉武
宗皇帝聖旨是自後但遇會試先一年春各省照前數
與各該司府朝覲官順齋赴部至期有故違者本部指名
叅究就責本官借貸交納

嘉靖三十一年本部奏准會試刊字刷印等匠工價分

永平等七府每名該工食銀二兩八錢

闕

大名二府

各八名各該銀二十二兩四錢順德廣平二府各七名

各該銀十九兩六錢河間府五名該銀十四兩真定府
十名該銀二十八兩保定府九名該銀二十五兩二錢
遇會試年分行文各府催取

正德五年十二月內該本部題會試供給場中合用米
麥盡數戶部關支不必拘定將在倉一二年者給放奉
武宗皇帝聖旨是欽此自後每遇會試之年該本部具
題咨行戶部取老米一百二十四石八斗糯米三十八
石粟米九十五石小麥二百一十石本部劄付順天府

委屬官一員徑赴戶部太倉照數關支運場應用

會場治辦

正德八年十二月內該本部題會試合用蘆蓆一萬五千領咨行戶部於在京各倉借用奉武宗皇帝聖旨是欽此自後每遇會試之年照前數借用仍劄順天府委官搬運場中聽用事完給還其科場供給下程付精膳司行搭蓋棚宇咨行工部取長杉條三百根仍劄順天府委官前去該部借領應用事畢責令委官交還工部

凡治辦本部於會試前一年八月內將合用修理試院廳房板舍添蓋廠屋并考官禮幣下程入院出院管待茶餅狀元冠服帽帶進士巾服恩榮宴花簾內外官舉人巡綽官軍人等飲饌筆墨紙劄辦事官吏等項題請通行各衙門預辦送用

凡考官禮幣本部於會試年正月內行內府承運庫照例關領綵段二十一表裏考試官二員綵段四表裏同考試官十七員每員綵段一表裏

凡題請考官本部於會試年正月初九日題請考試并
執事等官筵宴同日題請主考官又於正月二十四日
題請考試官本部筵宴二月初七日題請考試并同考
官及執事等官辭朝入場

刻錄支費

刻登科錄其紙劄等項查照舊規將後開物件照例行
順天府官錢內支價收買送部應用

御覽登科錄紙六百張奏本紙六萬張藍絹七段每段

二丈中夾紙四千張藍青連七紙七十五張大黃夾膀
紙一百張心紅一斤十四兩小石硯七十五箇墨三十
笏碧青紙七百五十張棕十斤八兩麪五十五斤白連
七紙九千四百五十張黃綾一丈五尺紅綾五丈蠟燭
七百五十枝行移紙一千一百三十七張墨煤六斤藍
綾二段每段二丈粗墨七斤八兩梨木板八十片黃羅
銷金包袱二箇紅羅銷金包袱四箇筆一百五十枝

定會試試官例

景泰三年初禮部會試其主試官二人出上命同考試官從禮部推選翰林院官京官教官皆得為之至是禮部尚書胡濙言翰林院春坊以文藝為職業宜專其事京官繇科第有學行者宜兼取以充之教官不許請著為令從之

寬限科會試禁

弘治二年會試舉人林瀾等奏近例舉人三試不中者不許復試臣等艱苦萬狀臨試猝遇此令坐守者有空

歸之嘆遠來者有徒行之勞乞下所司別有議處禮部
覆議前日移文初下各處舉人未及周知其令明年再
入試一次以後仍依舊例從之

副榜就教嚴限

弘治四年禮部奏今次會試所取副榜舉人凡在監五
年以下并未入監及新科年歲相應者俱令就教職不
許告免仍遵天順八年詔例署職九年考滿者方許再
會試一次從之仍命署職六年以上有舉人者亦許會

試時副榜舉人多不願就教職者故禮部奏嚴其限

條上革弊四事

嘉靖四十四年以禮部會試天下舉人命御史李邦珍
鮑承廕監試周宏祖顧廷對場外搜檢詔申嚴懷挾傳
遞之禁犯者執送法司問罪仍於禮部前枷號一月邦
珍等條上革弊四事

一舉人試卷禮部印鈐已完送提調官收領臨期舉人
入場至大門外驗票給領以防洗改脚色彼此交換之

弊

一請留朝覲二司及府縣官臨期督集所屬舉人照依省分及府縣次第挨次點檢照進以防冒替代筆之弊一舉人有不服搜檢及攬先落後不循序進違規者輕則扶出重則叅奏以防喧競抗違之弊

一請增軍三百餘名嚴密搜檢場外仍選差叅將官一員帶領官軍晝夜巡邏俟揭曉乃止以防懷挾透漏之弊詔允行

殿試

題請合行

本部先於二月十五日題請廷試讀卷放榜日期及合用書桌并讀卷等官午飯與在部宿歇早晚飯食恩榮宴登科錄板片紙劄題名碑石等項候旨下行各該衙門備辦送用

請讀卷官

本部例於三月初七日題請十五日殿試其執事等官

行移各衙門取用讀卷官照例擬定另本開坐請旨

一讀卷官 內閣 六部 都察院 通政司 大理

寺正官 詹事府 翰林院堂上官計十四員

廷試

甲第從公會取

嘉靖五年禮部尚書席書言舊例廷試貢士掌卷官先行看閱分送內閣然後以次及於九卿進士甲第前後第決於讀卷官職之尊卑不復論其文之高下非所以

示大公也自今請糊名混送以防奸弊其一甲三名不分內閣九卿從公會取既定然後論次均填不宜偏私以官爵為序疏入上初未允書復論乃許之

館選

考選庶吉士

弘治六年四月大學士徐溥等言比給事中徐旦建議欲選新進士改庶吉士入翰林院讀書惟庶吉士之選自永樂二年以來或間科一選或連科屢選或數科不

選或合三科同選初無定限每科選用或內閣自選或禮部選送或會吏部同選或限年歲或拘地方或採譽望或就廷試卷中查取或別出題考試亦無定制自古帝王皆以文章關乎氣運而儲才於館閣以教養之本朝所以儲養之者自及第進士之外止有庶吉士一途凡華國之文與輔世之佐咸有賴於斯然而或選或否則有才者未必皆選而所選者又未必皆才若更拘於地方年歲則是已成之才或棄而不用而所教者又未

必皆有成請自今已後立為定制一次開科一次選用
待新進士分撥各衙門辦事之後俾其中有志學古者
各錄其平日所作文字如論策詩賦序記之類限十五
篇以上於一月之內赴禮部呈獻禮部閱視訖編號封
送翰林院考訂其中詞藻文理有可觀者按號行取本
部仍將各人試卷記號糊名封送照例於東閣前出題
考試其所試之卷與所投之文相稱即收以預選若其
詞意鉤棘而詭僻者不在取例中間有年二十五以下

果有過人資質雖無宿構文字能於此一月之間有新
作五篇以上亦許投試若果筆路可通其學可進亦在
備選之數每科不必多選所選不過二十人每選不必
多留所留不過三五輩如此則所選者多是已成之才
有所論撰便堪供事將來成就必有足賴者如是則預
列者無徇私之弊不預者息造言之謗臣等皆出此途
引進後賢儲之館閣以報國厚恩乃其職也疏入上納
之命今後內閣仍同吏禮二部考選

考選館職限數

嘉靖五年禮部覆御史周煦議考選館職宜每科一舉
每選不出二十人留館不出五人務求學行俱優將來
効用必有可觀疏入上命內閣便會同吏禮二部從公
考選必年少可進學送翰林院讀書

欽定庶吉士名數

嘉靖二十年先是大學士翟鑾言今年庶吉士之選奉
聖諭於八月內行屆期值孝康敬皇后大喪是以未遑

今進士開選在即宜遵諭舉行欲照嘉靖十四年例不限年歲俱引赴文華殿大門外恭候欽試或止依先年例臣會同吏禮二部堂上官并翰林院掌印官於東閣限三十五歲以下取考品列次第進呈恭候聖明裁定詔暫照先年例會考取擬封卷呈覽上復諭大學士夏言等曰考選庶吉士必精擇吉人已乃欽降御題文曰原政詩曰讀大明律於是大學士言等會同吏禮二部并翰林院官於東閣考試取正副四十五卷進呈上親

賜鑒別欽定三十三名

題名

進士題名記

嘉靖七年大學士楊一清言舊例進士開科禮部奏請於國子監立石題名命儒士撰記以昭盛典傳之永久正德六年以來國家多事因循不作皇上敦化崇文始命輔臣追記補之嘉靖五年丙戌科題名記僉謂臣職當撰述臣竊謂此記雖禮部題請命翰林院撰文然未

嘗奉旨專何官而各年碑石竝書臣某奉勅撰其文又未嘗呈覽揆之事體似有未安竊聞先朝大學士楊榮李賢等連科撰述皆出宸命況我皇上聖文溢發凡近日冊詔誥勅有所指點皆非臣等所及臣謹以所撰稿錄進伏乞少運睿思改撥工部仍行翰林院擬定制勅房官一員書寫刻石以後俱可照此行上從其言遂著為例

禮部志稿卷七十二